

إضحكي

يجني اللي في شفافك
كان غارس..
إضحكي..
تنولد فينا البراءه
نرجع أطفال من جديد
وكل يوم بضحكتك..
يبتسم بقلوبنا
ويصير عيد..
ونلبس ثيابنا الجديده
وينشرح ف البال هاجس..
إضحكي..
إنتي أحلى من ضحك
وانتي أجمل
من يخلي بضحكته
حرّ الرياض
يصير نسيم..
وظل هامس..

خلي قلبي..
فيك يلامس..
صبح قلبك..
والندى..
وعطر الملايس..
إضحكي خلي الربيع
يحتفل..
يملي كفوفي..ورد..
وامطار..
ومحابس
إضحكي خلي الحياه..
تصبح أروع
والفضا بالحب..أوسع..
واللغه تصبح نديّه..
والكلام يصير حمام..
والسلام .. يصير حارس
إضحكي..
الطيور..تلقى سكن
والغريب.. يلقي وطن
والفرح يملا الشوارع

إضحكي..
ويطيح من خيل الحزن..
حزبه..
وفارس..
أضحكي..
البحر لك يلبس
الثياب الزرق
وتزغرد نوارس
والشجر يرجعله لونه
حتى لوكان الغصن ذابل..
ويابس
إضحكي..
تطلع أقمار ونجوم..
ويبتسم وجه النهار..
بليل دامس..
أضحكي..
تصبح الأيام أجمل..
والصباح يصير أطول..
والأمل يزهر في يائس..
إضحكي..

مسفر الدوسريه